

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj 49/06 i 51/09), člana 25. Statuta Grada Tuzle („Službeni glasnik Grada Tuzle“, broj 6/21 i 4/25) i člana 94. Poslovnika Gradskog vijeća Tuzla („Službeni glasnik Grada Tuzle“, broj 5/22, 14/24 i 5/26), Gradsko vijeće Tuzla, na sjednici održanoj 23. 6. 2026. godine, donosi

REZOLUCIJU

o podršci očuvanju uloge Ureda visokog predstavnika u Bosni i Hercegovini i evropskom putu Bosne i Hercegovine

I

Gradsko vijeće Tuzla potvrđuje svoju opredijeljenost za očuvanje mira, stabilnosti, demokratskog razvoja, vladavine prava i evropske budućnosti Bosne i Hercegovine, kao države ravnopravnih građana i naroda, zasnovane na Dejtonskom mirovnom sporazumu i Ustavu Bosne i Hercegovine.

Tuzla, kao grad prepoznat po multietničnosti, toleranciji i zajedničkom životu svojih građana, smatra da upravo takve vrijednosti predstavljaju temelj za izgradnju stabilne, demokratske i evropske Bosne i Hercegovine.

II

Gradsko vijeće Tuzla poziva članice Vijeća za implementaciju mira (PIC) da nastave djelovati jedinstveno, odgovorno i koordinirano u odnosu prema Bosni i Hercegovini, imajući u vidu značaj očuvanja mira, stabilnosti i funkcionalnosti države.

Gradsko vijeće Tuzla smatra da unutrašnje razlike među međunarodnim akterima ne smiju ugroziti dosljednu podršku institucijama Bosne i Hercegovine, njenom demokratskom razvoju, vladavini prava i evropskim integracijama.

III

Gradsko vijeće Tuzla izražava punu podršku daljem radu Ureda visokog predstavnika (OHR) u Bosni i Hercegovini kao važnog mehanizma za očuvanje Dejtonskog mirovnog sporazuma, ustavnog poretka, institucionalne stabilnosti i mira.

Gradsko vijeće Tuzla smatra da se ne smije dovoditi u pitanje opstanak OHR-a niti umanjivati njegove nadležnosti sve dok postoje političke okolnosti koje mogu ugroziti funkcioniranje institucija Bosne i Hercegovine i provođenje Dejtonskog mirovnog sporazuma.

IV

Gradsko vijeće Tuzla podsjeća da je Bosna i Hercegovina u proteklom periodu bila suočena sa brojnim političkim blokadama i osporavanjima nadležnosti državnih institucija, što potvrđuje potrebu za kontinuiranom podrškom međunarodne zajednice očuvanju ustavnog poretka, mira i stabilnosti.

V

Gradsko vijeće Tuzla smatra da je od posebnog značaja da budući visoki predstavnik nastavi djelovati nepristrasno i dosljedno u interesu svih građana Bosne i Hercegovine, uz snažnu podršku evropskim i euroatlantskim integracijama, ekonomskom razvoju, jačanju demokratskih institucija i vladavine prava.

VI

Ova rezolucija dostavit će se Vijeću za implementaciju mira (PIC), Uredu visokog predstavnika u Bosni i Hercegovini (OHR), Predsjedništvu Bosne i Hercegovine, Parlamentarnoj skupštini Bosne i Hercegovine, Parlamentu Federacije Bosne i Hercegovine, Narodnoj skupštini Republike Srpske, medijima i javnosti.

VII

Ova rezolucija stupa na snagu danom usvajanja i objavit će se u “Službenom glasniku Grada Tuzle”.

Bosna i Hercegovina
Federacija Bosne i Hercegovine
Tuzlanski kanton
GRAD TUZLA
Gradsko vijeće
Broj: 01-04-A-9428-2026
Tuzla, 23. juna 2026. godine



PREDSJEDAVAJUĆA

Ana Pejić, BA prava